

## San Pablo kintlajkuililia non de Éfeso

*Pablo kintlajkuililia n tokniwah de Éfeso*

<sup>1</sup> Ne Pablo, akin Dios okimonekilti maniyeto itlatitlanil n Cristo Jesús. Ne nomechtajkuililia nomejwah non nonchantitokeh Éfeso, nomejwah akimeh nonteaxkawah de Dios iwa nonkinel-tokah Cristo Jesús. <sup>2</sup> Totajtsi Dios iwan Toteko Cristo Jesús, manomechmakakah intlatiochiwalis iwa inyolsewilis.

*Totajtsi Dios techmaka itiochiwalis por Cristo  
Jesús*

<sup>3</sup> Maweyijkachito Dios, Itajtsi n Toteko Cristo Jesús, Akin yotechtiochi ika nochí tlatiochiwálistli tlan onka ilwikak por Cristo. <sup>4</sup> Dios otechpéjpenki por Cristo desde ijkuak ayamó okatka n tlaltíkpaktli, para matiyetokah tiyolchipawakeh por itlasojtlalis iwa amo matikpiakah tlajtlákoli inawak. <sup>5</sup> Dios, okisentlali techseliskia kemi titepilwah por Cristo Jesús, ijkó kemi Ye okimonekilti. <sup>6</sup> Yika, nochipa tikweyijkachiwah Dios por itlasojtlalis non techpialia por tikateh iwan Ikone non satlawel kitlasojtla. <sup>7</sup> Iwa Cristo ika iesso okintlaxtla totlajtlakolwah, iwa Dios yotechtlapojojpolwi por itlasojtlalis non saikpanoa. <sup>8</sup> Dios okipixki teiknomatilis ijkuak otechmák nochí ixtlamatílistli iwa tlalnamikílistli. <sup>9</sup> Iwa otechmatilti tlan Ye kimonekiltia, iwa tlan Ye inewia okijto kichiwaskia non amaka okimatia.

**10** Ye ni tlan kichiwas ikuak ajsiki n tonati, Dios kiseitilis nochí tlan onka ilwikak iwa itech n tlaltípkaktli imak Cristo para makinawatijto.

**11** Akimeh tikateh iwan Cristo, Dios yotechpéjpenki desde acharto para matikselikah tlan yotechkakitijkeh techmakaskeh. Iwa nochí ni mochiwas kemi Dios yokijto kichiwas, Akin nochí kichiwa kemi Ye kimonekiltia. **12** Ijkó, tejawah akimeh acharto yotikneltokakeh Cristo, matinemikah kemi Ye kiwelita para ijkó weletis kiyektenewaskeh iweyilis. **13** Nomejwah, ononkikakeh n kualitlátoli de Dios non temakixtia iwa ononkineltokakeh n Cristo Jesús. Onomechneskayotijkeh iwan Ye, ika Iespíritu Santo non Ye okisentlali kitemakas. **14** Dios ika n Espíritu Santo kisentlalia techmakas tlan yotechkakitijka techmakas. Ijkuak Ye kinmopejpenis iwa yokitlaxtla totemakixtilis non Ye iaxkawah. Para makiweyijkachiwakah por iweyilis.

*Pablo kitlatlaujtia Dios makinmaka  
ixtlamatílistli n tlaneltokakeh*

**15** Yika, ne kuali nikmatok nomejwah nonkineltokah n Toteko Jesús iwa nonkintlasojtlah akimeh kitlakitah Dios, **16** amo nimosotlawa nimotiotstsilis iwa nimotlasojkamatis por nomejwah. **17** Niktlajtlanilia Dios Itajtsi n Toteko Cristo Jesús, n Totajtsi non weyikajtitok, manomechmaka ixtlamatílistli iwa mamotenexti nomotech por iespíritu. **18** Noiwa niktlajtlanilia Dios manomechtlawili nomotlalnamikilis\*, iwa

---

\* **1:18** n griego kijtoa ixtololowah de nomoyolo

ijkó nonkimatiskeh tlan para onomechnotski iwa tlan nomechmakas. Porke weyi iwa mawistik tlan Ye kinmaxkatalis iaxkawah.<sup>19</sup> Iwa xikmatika sa weyijtik iweletilis, non amo keman tlamis, non techpalewia akimeh tikneltokah. Nin weletílistli ye non Dios okitenexti ika miak chikawálistli,<sup>20</sup> ikuak okiyoliti n Cristo de kan mikemeh iwa okiyayanti ik iyekma ompa ilwikak.<sup>21</sup> Dios okimák n Cristo weyi tekiwájyotl, iwa okiweyijkatlali ipan nochteh n tekiwajkeh, n tlanawatijkeh, iwa ipan nochti tlan onka iwa nochti tlan motenewa itech ninteh tonatijmeh, iwa non satepa witseh.<sup>22</sup> Dios okitlali nochti iikxitla n Cristo, iwa Ye okitlali tlayákanki de nochteh n tlaneltokakeh non tkmajmana itlapejpenilwah.<sup>23</sup> Tejwah ye ikuero n Cristo iwa Ye n tlayákanki. Porke ika Cristo nochti ajsitok iwa amitla kipoloa.

## 2

### *Dios techmakixtia ika itlasojtlalis*

- <sup>1</sup> Dios onomechyoliti ikuak nomejwah ononmiktakah itech nomotlajtlakol.
- <sup>2</sup> Nomejwah ononkichiwayah tlan kichiwayah n tlaltikpaktlakah. Ononkichiwayah tlan kiwilita non tlanawatia kan ejekatl, iwa axa kinyakantok akimeh amo kitlakitah Dios.
- <sup>3</sup> Itech oksikimeh tonatijmeh tejwah noienda ijkó otikchiwayah. Otikchijtinenkeh tlan kichiwayah n tlaltikpaktlakah, iwa tlan amo kuali otechyoltlanaya. Yika, ika totlajtlakolwah yotikmotlanilijtokah n tlaijyowílistli non kiseliskeh akimeh tlajtlakolchijtinemih.
- <sup>4</sup> Pero

Dios ken satlawel teiknoma, iwa ken miak techtlasojtla,<sup>5</sup> maya ok otimiktokah por totlajtlakolwah, Ye okichi matiyolitokah sansikah iwan Cristo Jesús. Yika, Dios otechmakixtiko porke otechtlasojtlak.<sup>6</sup> Dios noiwa otechyoliti sansikah iwan Cristo Jesús, iwa otechyayanti iwan Ye, kan ilwikak.<sup>7</sup> Ijkí okichi, para kiteititis itech tonatijmeh non sakin witseh kenijki saikpanoa techtlasojtla iwa saikpanoa techiknomati por Cristo Jesús.<sup>8</sup> Yika por itlasojtlalis Dios, nomejwah ononmomakixtijkeh por ononkinetokakeh, amo nomotech kisa, yej porke Dios onomechtliokoli.<sup>9</sup> Amo onomechmactilijkeh n temakixtilistli por ononkichijkeh tlan kuali, para amaka mamoweyili.<sup>10</sup> Tejwah Dios otexchijchi, otexchijchi para matikchiwakah tlan kuali kemi Cristo, Dios ijkó yokimajmanka matikchiwakah.

### *Ika imikilis Cristo, Dios otechtlapojpolwi*

<sup>11</sup> Ijkó kiné, nomejwah akimeh amo non judíojteh xikilnamikikah kenomi ononkatkah. Nomejwah akimeh amo nonmixewayotekih, nomechtokayotiah amo non “sirkunsidados”\* nekateh akimeh monotsah “sirkunsidados” non san kinmixewayotekih n tlakah, iwa motokayotiah sirkunsidados.<sup>12</sup> Achtó nomejwah mach ononkixmatiah n Cristo, nion amo ononkatkah judíojteh, nion ononkimatiah tlan Dios okinmili kinmakas n judíos ijkuak omosenka inwah. Amitla ononkipiayah tlan ika nonmoyolchikajtoskiah itech nin tlaltípkaktli

---

\* **2:11** insirkunsisos: okintokayotiayah insirkunsisos nochteh non amo okikuawewayotekiah intlakayo.

nion ononkixmatiah Dios. <sup>13</sup> Pero axa nomejwah akimeh achto ononkatkah wejka de Dios, axa por iesso Cristo Jesús ya nonkateh íwa. <sup>14</sup> Cristo Jesús otechalikili yolsewílistli: Ijkuak Cristo omikki itech krus okichi kemi yaskia okixitini se tepamitl non okintlajkoxelojtokah judíojteh iwa non amo judíojteh porke omokokoliaya, iwa okinseitiliko. <sup>15</sup> Ika imikilis, Cristo okichiwako mapojpoliwi n tlanawátili non achto otlanawatijtoka. De nonteh ome altepemeh san se yankuik altepetl okitlali, non mayeto itech Cristo. Ijkó sansikah okinseitili iwa okinyolyankuili n tlakah para mayetokah kemi Ye, iwa makipiakah yolsewílistli. <sup>16</sup> Cristo omikki itech krus para mamotlapojpolwikah iwan Dios nochteh n judíojteh iwa non amo judíojteh, iwa okichi mayetokah íwa kemi yaskia san se kuerpo. Ijkó Dios okipojpolo n nexikólistli non okipiaya se iwan ok se.

<sup>17</sup> Cristo owala iwa okitematilti n kualitlátoli de yolsewílistli. Onomechmatilti nomejwah akimeh ononkatkah wejka de Dios, noiwa okinmatilti non amo wejka okatkah. <sup>18</sup> Yika, por Cristo, tijudíojteh noso amo tijudíojteh weletis timijkuaniskeh kan Totajtsi Dios san ika se Espíritu. <sup>19</sup> Yika, nomejwah akimeh amo non judiojteh ayakmó nonkateh kemi se non san mokalotiah, yej noiwa nomechaxkatislis nomejwah tlan iaxka n Dios. Axa nomejwah noiwa yononmochijkeh ipilwah n Dios. <sup>20</sup> Nomejwah kemi se weyi kali, iwa nontlakxilitokeh itech intlamachtilis n tlatitlánilti iwa n profetas. Cristo Jesús, Ye non okachi weyi tetl, non kitlakxilijtok non kali. <sup>21</sup> Iwa kemi nin kali tlakxilitok itech Cristo,

moajkokti iwa moyekiskaltijti asta mamotlamiti se tiokali chipawak para Toteko. <sup>22</sup> Ijkó nomejwah ken nonseititokeh iwan Cristo, nonnochteh nonmoseitiliah para nonkimajmanaskeh san se kali iwa ompa chantis Dios ika Iespíritu.

### 3

*Dios kititlani n Pablo makinmatilti n kualitlájtoli  
non amo judíojteh*

<sup>1</sup> Ne Pablo, ni tsaktok por onomechmatilti nomejwah akimeh amo judíojteh n kualitlájtoli de Cristo. <sup>2</sup> Nomejwah kuali nonkimatokeh, por itlasojoatlalis Dios onechmák nin tekitl para nomechpalewis. <sup>3</sup> Dios onechnextili tlan achto otlaatitoka, iwa onechmatilti, ijkó kemi achto yonomechtajkuilili kech tlájtoli. <sup>4</sup> Ijkuak non kiama poaskeh tlan nomechtajkuililia, nonkajsikamatiskeh milák nikmati tlan Cristo onechmatilti. <sup>5</sup> Semi yowejka, amo okititi nion se tlaltikpaktlakatl tlan Dios okisentlali kichiwas. Pero axa, ika Iespíritu yokinnextili itlatitlanilwah iwa iprofetajwah yolchipawakeh. <sup>6</sup> Iwa ye ni tlan amaka okimatis: n kualitlájtoli de Dios non techmakixtia, techmatiltia nomejwah akimeh amo non judíojteh noienda nomechtlaaxkatiskeh iwan judíojteh. Noienda nomechmatiltia nomejwah ya nonseititokeh itech ikuerpo n Cristo, iwa nonkiseliskeh tlan Dios okisentlali kinmakas akimeh kineltokah Cristo Jesús.

<sup>7</sup> Dios satlawel onechtasojtlak iwa ika iweletilis onechtliokoli nin tekitl para maniktematilti n kualitlájtoli. <sup>8</sup> Maski amitla nopati innawak

n yekmilajkameh non iaxkawah Dios, Ye onechtliokoli nin tekitl para manikinmatilti non amo judíojteh n kualitlajtoli non amaka weleti kajsikamati. <sup>9</sup> Onechtlali manikinmajsikamatilti n tlaltikpaktlakah nochi tlan Dios yowejka okitlatijtoka, Ye Akin okichijchi nochi tlan onka.

<sup>10</sup> Axa ijkí moneki, nochteh akimeh kineltokah Cristo, makiteixmatiltikah iixtlamatilis, iweletilis iwa ichikawalis Dios, para makixmatikah akimeh tlanawatiah tlakpak.

<sup>11</sup> Dios ijkí okichi por Toteko Cristo Jesús, kemi Ye yokimolijka kichiwaskia desde ikuak ayamó okatka n tlaltíkpaktli. <sup>12</sup> Iwa axa kemi ya tikneltokah Cristo Jesús, timijuaniah inawak Dios, iwa ayakmitla tikmawiliah por n tlaneltokálistli non tikpiyah itech. <sup>13</sup> Yika, nomechtlatlaujtia amo ximosotlawakah ikuak nonnechitah nitlaijyowijtok, xiyolpakiyah porke non tlaijyowílistli nomechpalewis iwa nomechmaka tlakitálistli.

### *Itlasoijtlalis Cristo*

<sup>14</sup> Yika, nimotlankuaketsa inawak Dios Itatsi n Toteko Cristo Jesús. <sup>15</sup> Akin itech mote newah intokah, kan ilwikak iwa itech tlaltíkpaktli.

<sup>16</sup> Niktlatlaujtia Notajtsi manomechmaka tlan Ye kitlawelpia itech iweyilis, noiwa manomechmaka weletílistli iwa chikawálistli itech nomoyolo por Iespíritu, <sup>17</sup> para machantito Cristo itech nomoyolo porke ijkó nonkineltokah. Ijkó nomejwah xitlakxilitokah iwa kuali xinelwayotitokah itech nomotetlasoijtlalis. <sup>18</sup> Ijkó nomejwah nonweletiskeh nonkajsikamatiskeh iwan nochteh n

tokniwah non kineltokah Cristo Jesús, kenijke  
saikpanoa  
patlawak  
weyak  
wejkatla iwa  
wejkapa  
itlasojtlalis n Toteko Dios.

**19** Yika, niktlajtlanilia Dios, xikixmatikah non tla-  
sojtlálistli, non kipanawia nochí tlan tikixmathi,  
para ijkó nonweletiskeh nonkiseliskeh nochí tlan  
Dios kipixtok para nomejwah.

**20** Matikweyilikah Dios, Akin kipia  
miak weletílistli para kichiwas okachi  
miak de tlan tejwah tiktlajtlani noso  
tiknejnewiliah por iweletilis non tekiti totech.  
**21** ¡Matikweyijkachiwakah nochipa Dios kan  
timololoah, por Cristo Jesús tejwah akimeh Ye  
otéchnotski, por nochteh non sikin tlakatijtiaskeh,  
axa iwa nochipa!

## 4

### *N Espíritu Santo techseitilijtok*

**1** Ne Pablo, nitsaktok por niktektilia n  
Toteko Jesús, nomechtlatlaujtia xiyeknemikah  
kemi moneki, porke nomejwah Dios  
onoméchnotski para xiyetokah iaxkawah.

**2** Nochipa ximoiknelikah iwa xitenotsakah,  
ximosepanyekwikakah iwa ximosepanxikokah  
ika tlasojtlálistli. **3** Ximochijchikawah para n  
Espíritu maseitito nomowah, ika n yolsewílistli,  
non seititok nomowah. **4** Onka san se kuerpo,  
iwa onka san se Espíritu, iwa onka san se tlan

tikchiah akimeh Dios otéchnotski. <sup>5</sup> Onka san se Toteko, san se totlaneltokalis, iwa san se totlakuaatekilis. <sup>6</sup> San se Todios, iwa Totajtsi tikpiah, Akin tlanawatia totech, Ye tekiti totech iwa kajki itech tinochteh.

<sup>7</sup> Tinochteh otikinseljkeh tlatliokolilteh non Cristo okinek techinmakas. <sup>8</sup> Yika itlajkuilol Dios kijtoa:

Cristo otlejkok ilwikak,  
okitsakuato tlan otechmapixtoka,  
iwa okinmák iweletilis n tlakah kemi se  
tlatliokólili. *Sal. 68:18*

<sup>9</sup> Iwa, ¿tlan kijtosneki “otlejkok ilwikak”? Kijtosneki achto otémok nika ipan tlaltípaktli kan okachi tlawejkatla. <sup>10</sup> Akin otémok, Ye Akin oksepa otlejkok ilwikak kan okachi tlakpak, para Ye kitemitis nochi tlan onka. <sup>11</sup> Ye inewia okinmajmák sejse inteki,

sikimeh okintlali mayetokah tlatitlánilti,  
oksikimeh profetas,  
oksikimeh matetlapowikah n kualitlátoli,  
oksikimeh okintlali mayetokah tlajpixkeh,  
oksikimeh temachtijkeh.

<sup>12</sup> Ijkó okinmititi iaxkawah para maweletikah matekitikah iwa matikyekiskaltikah ikuerpo Cristo, <sup>13</sup> asta tinochteh matiajsitih matiseititokah itech totlaneltokalis iwa tinochteh matikyekixmatikah Ikone Dios. Noiwa matimoyekchikawah kemi se tlakatl yekmilajka, ijkó timoskaltiskeh iwa timotlamitiweh kemi Cristo. <sup>14</sup> Ayakmó tiyetoskeh kemi tikokoneh, non san kipapatlah intlalnamikilis ikuak kikakih itla ok se

yankuik tlamachtílistli, iwa kimokawiliah makinkajkayawah nekateh akimeh kinekih kinkuatlapololtiskeh para kinwikaskeh itech oksikimeh ojmeh non amo kualteh. <sup>15</sup> Nochipa matitetlapowikah tlan milák ika totlasoxtlalis, iwa ijkó timoskaltijtiaskeh íwa n Cristo porke Ye itsonteko n kuerpo. <sup>16</sup> Iwa por Cristo nochí n kuerpo moseitilijtih iwa mosalojtiwih nochteh n omiomeh. Iwa ikuak nochí kuali tekith, kuali moskaltijtih iwa mochikajti ika tlasoxtlálistli.

### *Cristo okichi matiyolotkah nochipa*

<sup>17</sup> Ye ni tlan nomechnawatia itech Itoka n Toteko Jesús: Ayakmó xinentinemikah kemi nemih akimeh amo kineltakah Dios, porke yejwah moixpolojtinemih itech tlan amo kuali kiyeyekolah. <sup>18</sup> Intlalnamikilis kajki kan tleyuálistli, yejwah amo kipiah n nemílistli non Dios kitemaka, porke oyoltlakuawakeh, yika, amo kajsikamatih tlan Dios kineki makichiwakah. <sup>19</sup> Yejwah ayakmó pinawah iwa yomosenkajkajkeh itech tlan kelewia, iwa amo ixwi h kichijtinemiskeh nochí tlan teyolijtlakoa. <sup>20</sup> Pero nomejwah amo ononkixmatkeh n Cristo para axa ijkó nonkichihtinemiskeh. <sup>21</sup> Tla de milajka ononkikakeh n Jesús, iwa onomechmacti, nomejwah ononkajsikamatkeh Ye kijtoa tlan milák. <sup>22</sup> Kemi yonomechititijkeh, xikkawakah tlan achto ononkichihtinemiah, porke nochí noni onomechixpoloaya iwa onomechyolijtlakoaya ika tlan okelewiaya nomokuerpo, <sup>23</sup> iwa xikyankuilikah nomoixtlamatilis ika nomoespíritu. <sup>24</sup> Ijkó ximoyolpatlakah,

ika se yankuik nomonemilis kemi Ye inewia yetoskia ika se nomonemilis chipawak iwa yekmilajka.

<sup>25</sup> Yika, ayakmó ximokajkayawahak, yej nochipa xikijtokah tlan milák, porke tinochteh titeaxkawah itech ikuerpo Cristo.

<sup>26</sup> Tla nonkualaníh, amo xitlajtlakolchiwakah. Amo xikkawilikah makalaki n tonati iwa nomejwah ayamó nonmoyolsewiah. <sup>27</sup> Amo xikkawilikah n diablo manomechkajkayawaki para nonkichiwaskeh tlan amokuali.

<sup>28</sup> Akin otlachtekia, ayakmó matlachteki, yej mapewa matekiti ika imawah para makipia tlan ika kimpalewis akimeh kimpoloa.

<sup>29</sup> Amo xikimijtokah tlájtolteh pitsotikeh, yej xiktenewakah kuali tlájtoli tlan ika kinyolchikawas, kimpalewis iwa kintiochiwas akimeh kikakih non tlájtoli. <sup>30</sup> Amo xikchiwakah mamoyolkoko Iespíritu Santo n Totajtsi Dios, porke ika n Espíritu onomechneskayotijkeh kemi iaxkawah Dios, asta ikuak ajsiki n tonati ikuak Ye nomechselis non yolchipawakeh.

<sup>31</sup> Xikkawakah nochí tlan nomechkuejsoa, iwa nomotlawelitalis, ayakmó ximotsatsajtsikah, nion ximowijwikaltikah, iwa xikmokixtilikah nochí tlan amokuali. <sup>32</sup> Moneki xiyetokah nonkualtentlakah iwa xiteiknomatikah. Ximosepantlapojpolwikah ijkó kemi Dios otechtlapojpolwi por Cristo.

## 5

*Kenomi kipiah de yeknemiskeh ipilwah n Dios*

<sup>1</sup> Nomejwah akimeh ya nontepilwah de Dios, ximilajkanemikah kemi Ye yekmilajka. <sup>2</sup> Nochipa xitetlasojtlakah kemi Cristo otechtlasojtlak, iwa omotemakti para makimiktikah topatka kemi se tlamánali ajwiak inawak Dios.

<sup>3</sup> Kemi nomejwah ya nonchipawakeh inawak Dios, ayakmó xikintenewakah akimeh momekatiyah, nion itla ok se tlajtlákoli, noso akimeh kitlawelneki kipiaskeh tomi. <sup>4</sup> Amo xipitsotlajtokah ika tlan tepinati, nion xikinmijtokah tlájtolteh non amo milajkameh, porke ayakmó technamiki ijkó titlajtojtinemiskeh, yej nochipa ximotlasojkamatikah inawak Dios. <sup>5</sup> Porke ya nonkimatokeh, tla aka momekatia, noso kichijtinemi tlajtlákoli, noso kitlawelneki tomi, kijtosneki kemi kiweyilijtoskia se “dios” non san kimachijchiwah, nochteh akimeh ijkó kichiwah, amo kalakiskeh kan tlanawatia Cristo iwa Dios. <sup>6</sup> Amaka manomechkajkayawa ika tlájtolteh non amitla impati, porke ikualanilis Dios, wits ipan nochteh akimeh kichiwah tlajtlákoli, iwa amo tetlakitah. <sup>7</sup> Yika, amo ximonelokah, inwah akimeh ijkó kichiwah.

<sup>8</sup> Itech oksikimeh tonatijmeh nomejwah onon-nemiah kan tleyua, pero axa ya nonnemih itech tlawilnextílistli, porke Toteko Dios nomechyakan-tinemi. Yika, xiyecknemikah kemi non ya kipiah itlawil n Toteko Dios, <sup>9</sup> porke itlawil Dios techyolpatla, iwa kichiwa matitetlasojtlakah, matikijtokah tlan milák iwa matiyetokah timilajkameh. <sup>10</sup> Yika, xikmatikah tlanón kipaktia n Toteko. <sup>11</sup> Amo xikchiwakah tlan amo tepalewia non kichiwah akimeh nemih kan tleyua, okachi kuali

xikinmilikah amokuali tlan kichiwah. <sup>12</sup> Porke satlawel tepinati tiktenewaskeh tlan yejwah kichtakachijtinemih. <sup>13</sup> Pero noch i tlan kitlawilia n tlawili, mota kenijke kajki. <sup>14</sup> Porke n tlawili kichiwa mamota noch. Yika kijtoa:

Xiijsa te non tikochtok

ximewa te non tika kemi timiktok,

iwa Cristo mitstlawilis itech monemilis. *Is. 60:1*

<sup>15</sup> Ijkó kiné, ximotlachilikah kenijke nonnentinemih. Amo xinemikah kemi non amitla kinekih kajsikamatiskeh, yej xiyecknemikah kemi non ya kixmatih itlajtol Dios. <sup>16</sup> Yika xikintiotilikah n tonatijmeh iwa nochipa xikchiwakah noch tlan kuali kemi Dios kimonekiltia, porke itech ninleh tonatijmeh yomomiakili tlan amokuali.

<sup>17</sup> Xitlalnamiktakah para ijkó nonkajsikamatiskeh tlan Dios kimonekiltia xikchiwakah. <sup>18</sup> Amo ximotlawantikah, porke noni teixpoloa, okachi kuali, matemi nomoyolo ika n Espíritu, para ye manomechyakana. <sup>19</sup> Ximosepanyolchikawakah iwa xikintlakuikakah salmos, tlakuíkalteh, tiotlakuikálisteh, iwa xikweyilikah n Toteko Dios ika noch nomoyolo. <sup>20</sup> Nochipa matimotlasojkamatikah inawak n Totajtsi Dios por noch tlan nonkiselijtokeh, itech Itoka n Toteko Cristo Jesús.

### *Kenomi moneki mamoyekwikakah non yomon-amiktiyekah*

<sup>21</sup> Ximosepantlakitakah, ijkó motas milák nonkitlakitah Cristo.

<sup>22</sup> Nomejwah siwameh, moneki xikmokawilikah manomechyakana nomookich, ijkó kemi

nonmotekawiliah manomechyakana n Toteko Cristo. <sup>23</sup> Porke n tlakatl ye akin kiyakanas isiwa, ijkó kemi Cristo kinyakana akimeh kineltokah, noiya Ye Akin kinmakixtia n tokniwah non kineltokah iwa kimajmanah ikuerpo. <sup>24</sup> Ijkó kemi non Dios okimpéjpenki kitlakitah Cristo, ijkó noiya n siwameh moneki makitlakitakah inmokich.

<sup>25</sup> Tlakatl non yotimonamikti, xiktlasojtlamosiwa, ijkó kemi Cristo otechtlasojtlak tejawah non Dios okimpéjpenki iwa omotemakti para makimiktikah por tejawah. <sup>26</sup> Iwa Ye okinmoyolchipawili ika atl, non atl ye itlajtol, <sup>27</sup> para techixpantis ixpa, tejawah non Dios okimpéjpenki kemi se tiopa non tsotlantok, chipawak amo xojxolochtik nion itla ok se non makiatlako, ijkó Ye kineki matietokah tichipawakeh iwa amo matikpiakah tlajtlácoli. <sup>28</sup> Noiya moneki n tlakatl makitlasojtlasiwa, kemi ye inewia kitlasojtlaikuero. Porke akin kitlasojtlasiwa, noiya ye motlasojtlal. <sup>29</sup> Porke amaka kikokolia ikuerpo, yej kimalwia iwa kitlakualtia. Ijkó noiya kichiwa Cristo inwah non kimajmanah ikuerpo. <sup>30</sup> Tejawah tikmajmanah ikuerpo n Cristo. <sup>31</sup> Yika itlajkuilol Dios kijtoa: “N tlakatl kikajtewas ita iwa ina iwa moseitilis iwanisiwa. Ijkó n tlakatl iwan siwatl mochiwaskeh sa se kuerpo.” <sup>Gn.</sup>

<sup>2:24</sup> <sup>32</sup> Nin tlájtoli, owi moajsikamati, pero ne nitlajtojtok de Cristo iwa de non moololoah itech Itoka. <sup>33</sup> Ijkó noiya, nochi tlakatl makitlasojtlasiwa kemi ye inewia motlasojtlal, iwa n tesiwanoiya makitlakita iokich.

**6***Tepilwah iwa tetajmeh*

<sup>1</sup> Tepilwah, xikintlakitakah nomotajwah, porke ijkó otlanawati Dios. <sup>2</sup> “Xiktlakita mopapá iwa xiktlakita momamá,” ye n achto tlanawátili non kipia tiochiwálistli, <sup>3</sup> “ijkó tikpias miak pakílistli iwa tiyolitos miak xiwitl itech nin tlali.” *Ex. 20:12; Dt. 5:16*

<sup>4</sup> Nomejwah tetajmeh, amo xikinkuakualanikah nomopilwah, yej xikinyekiskaltikah ika tlanonotsálistli iwa ika itlajtol n Toteko.

<sup>5</sup> Nomejwah akimeh nomechpixtokeh kemi tlanémakteh,\* xiktlakitakah nomoteko iwa xikiimakajsikah. Xiktektilikah ika nochí nomoyolo kemi non kitekitiliskia Toteko Cristo Jesú.

<sup>6</sup> Amo xiyektekitikah sanwel ikuak nomoteko nomechalitok, san para nonmokawaskeh kuali inawak, yej kuali xikchiwakah nomoteki kemi non-tekitkeh de Cristo, iwa ijkó nochipa xikchiwakah ika pakílistli tlan Dios kimonekiltia. <sup>7</sup> Xikchiwakah nomoteki ika pakílistli, kemi nonkitekitilijtoskiah n Toteko Cristo, iwa amo xikmolikah titekititokeh san para se tlakatl. <sup>8</sup> Porke ya nonkimatokeh tla aka tlanémaktli noso amo tlanémaktli, n Toteko kilaxtlawis tla kichiwas tlan kuali.

<sup>9</sup> Iwa nomejwah tekowajkeh, no iwa moneki ijkó xikchiwakah iwa nomotekitwah, iwa amo san xikinmomojtjtakah. Xikilnamikikah nomejwah

\* **6:5** Achto ikuak n tlakah okitewikiliyah miak tomi iwa aykmó oweletiah okikopayah omotemaktiayah esklavos.

iwa yejwah nonkipiah san se Nomoteko itech il-wikak, iwa Dios amo san se kitlawelita iwa ok se amó.

*N chikawálistli non Dios techmaka*

<sup>10</sup> Nokniwah, Ximochijchikawakah itech ichikawalis n Toteko Cristo. <sup>11</sup> Ximopalewikah ika iweletilis non Dios nomechmaka, iwa ijkó weletis nonkitlaniskeh n amokualitlakatl ikuak kinekis nomechkajkayawas. <sup>12</sup> Porke amo timotekilmakatokeh iwan tlakah non kipiah inmesso kemi tejwah, yej iwan espíritus amokualteh non nemih tlakpak, iwa kipiah weletílistli. Yejwah kinnawatijtokeh akimeh kichijtinemih tlan amokuali ken nemih itech tleyuálistli. <sup>13</sup> Yika, xiktektiltikah n chikawálistli non Dios onomechmák ika nontlaxikoskeh ikuak wits n tonati ikuak nomechyoltilanaki n amokualitlakatl, iwa ijkó xiktlanilikah iwa ximochikawakah iwa ximoyekketokah. <sup>14</sup> Ijkó kiné, ximoyekketokah, ximotlajkotelinikah ika n milák tlájtoli, iwa xitlakentitokah kemi ikuak se soldado konakia ikoto de tépostli para makipalewi. <sup>15</sup> Sa ximokaktikah para nontetlapowitiweh de n kualitlájtoli non techmaka yolsewílistli, ijkó kemi mokaktia se soldado ikuak yawi motekilmakati. <sup>16</sup> Noiwa xikpiakah nomotlaneltokalis kemi se tépostli non ika nonmopalewiskeh iwa nonkitsakuiliskeh ikuak n diablo nomechmojmotas ika kuawitl non xotlatok. <sup>17</sup> Ximokuaonakiltikah n tépostli non ika timomakixtiah, noiwa xikpiakah itlajtol Dios kemi se espada non techmaka n Espíritu Santo. <sup>18</sup> Nochipa ximotrotsajtsilikh,

iwa n Espíritu Santo manomechyakana ikuak nonmotlatlaujtskeh iwa nonkitlajtlaniliskeh Dios manomechpalewi. Ixmostla ximosepantiotsajtsiliytokah iwa amo ximosotlawakah, yej nochipa xiktlajtlanilikah Dios makimpalewi nomokniwah non iaxkawah Dios. <sup>19</sup> Noiwa xiktlatlaujtkah n Toteko manechpalewi, iwa manechinmaka tlájtolteh ikuak monekis nitetlapowis. Iwa manechmaka yolchikawálistli iwa maniweleti manikinteajsikamatilti non amo kixmatih de n kualitlátoli. <sup>20</sup> Dios onechtítlanki manitetlapowiti de n kualitlátoli de Dios non techmakixtia non ika axa onechtsakeh. Ximotrotsajtsilikah manimoyolchikawa manitetlapowi nin kualitlátoli kemi moneki.

### *Pablo iksemi momakawa*

<sup>21</sup> Tokni Tíquico totlasoj, se kuali tepalewi itechiteki n Toteko nomechmatiltis kenomi nika iwa tlan nikchijtok. <sup>22</sup> Yika nomechtitlanilia para manomechili kenomi tikateh, iwa manomechyolchikawa.

<sup>23</sup> Dios Totajtsi, iwa n Toteko Cristo Jesús makinmakakah n tokniwah yolsewílistli, tlasojtlálistli iwa tlaneltokálistli. <sup>24</sup> Dios makintiochiwa nochteh akimeh milák kitlasojoftlah n Toteko Cristo Jesús, ika tlasojtlálistli non ayik tlami.

**Itlajtol Totajtsi Dios  
New Testament in Nahuatl, Southeastern Puebla  
(MX:npl:Nahuatl, Southeastern Puebla)**

copyright © 2011 Wycliffe Bible Translators, Inc.

Language: Nahuatl, Southeastern Puebla

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nahuatl, Southeastern Puebla

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
4d269f11-cca1-521d-b89a-6683fffdc9c2